

欽定重修兩浙鹽法志

欽定重修兩浙鹽法志卷十四

律例二 現行則例

場員揀發同通試用并取身家殷實結

雍正六年五月吏部爲謹陳鹽政等事本年三月戶部會覆浙江總督李衛疏稱場員有稽查竈丁之責非潔已奉公不克勝任應將現任場員分別優劣咨部另補吏部於候補候選同知通判州縣等官內有家道殷實具呈到部者帶領引

見恭候

欽點命往浙江該督酌量分給各場管理鹽務三年內
果能杜絕私煎等弊保題以應得之缺卽用如不
能稱職勒令休致劣蹟昭著者題叅革職至江南
松所四場私鹽橫行商皆虧折非大爲變通不能
補救應於

命往同知等官內該督酌量身家最爲殷實者令其管
理三年任滿果能錢糧清楚引鹽多銷保題以應
陞卽用稍次者以原銜卽用倘不能稱職分別題
叅等因奉

旨依議欽遵在案再查到部各員照例取有同鄉京官
家道殷實印結但果否殷實之處臣等未能確知
應令該督詳加查問并取原籍地方官印結果係
身家殷實令其畱辦場務如有虛捏等情卽咨明
臣部具奏等因於雍正六年五月十六日將候選
通判楊維清等帶領引

見奉

旨楊維清等二十三員命往浙江交與李衛派委管理
鹽場事務欽此

逃徒加等治罪私販十人以上不分首從

雍正六年九月九卿詹事科道會議得刑部議覆浙
江總督兼理鹽務李衛條奏內稱鹽犯脫逃罪止
杖一百法輕易犯請加等按擬等語應如所請嗣
後販私案內各項徒犯已經發配逃走者照徒犯
未獲到官逃走之例分別加等按擬俱除去役過
月日面上刺逃徒二字原犯徒一年者枷號一個
月加倍杖八十徒二年徒一年半者枷號三十五
日加倍杖一百徒三年徒二年者枷號四十日加

倍杖一百流二千里徒二年半者枷號四十五日
加倍杖一百流二千五百里徒三年者枷號五十
日加倍杖一百流三千里其發往流所又逃者面
刺逃流二字枷號兩個月照依地里遠近改發充
軍查徒犯脫逃加等治罪面上刺字易於稽查則
徒犯皆知警惕應照刑部等衙門所議又議覆該
督疏稱例載旗人兵民聚至十人以上帶有軍器
興販私鹽者無論拒捕傷人俱照強盜已行得財
律立斬查現在殺傷事主盜案未經下手之夥盜

尚得量邀寬減而此不會致死兵役之鹽徒悉皆
駢斬似覺援照之條反重於本律臣愚以爲十人
以上鹽犯當論其殺傷已死及傷而不死與未曾
傷人有無疊犯之處將首從畧爲分別斬決監候
并酌量按擬絞罪軍流等語查鹽梟聚衆拒敵官
兵兇惡已極嗣後除十人以上拒捕若殺人及傷
三人以上者仍照例不分首從皆斬立決爲首者
梟首示衆外其餘十人以上曾否拒捕有無殺傷
之案亦應照盜案例令該督撫嚴行究審分別法

所難宥及情有可原者一一分晰於疏內開明仍照例不分首從定擬斬決具題大學士會同三法司酌量分別詳議具題將應正法者正法應發遣者發遣庶皆平允再議覆該督疏稱幫梟拒打奸民若歸於十人以上案內則皆應斬決若摘出問擬律無正條似應就人多寡與傷而未死之處分別首從按擬斬決監候軍流徒罪枷責等語查此輩奸民既同拒捕卽屬鹽梟自應歸并前議鹽梟案內分別首從及傷人與未傷人之處按例定擬

金匱要略卷之六
若於一案之內又另立一項首從罪名不特頭緒
紛繁且恐以拒捕官役之重犯減至枷責發落之
輕條轉得避重就輕益致借端私販應將該督所
請無庸議奉

旨依議欽此

場課仍歸場徵并考成處分

雍正七年四月吏部等爲遵

旨題覆事議得浙江總督兼理鹽務李衛疏稱竈課向
屬場員徵解因徵職難任錢糧重寄是以改令縣

徵現在場員既皆改用通判知縣州同等官應仍令場官設櫃徵收原封解交各縣拆并等語應如所請將各場竈課錢糧令場官就近徵收解縣又疏稱場員惟司代比催納若定以考成竟照經徵一體處分孰肯踴躍急公如有未完分數除止於罰俸外其應降職降級停陞者俱照離任官例罰俸一年免其停陞倘催徵不力許該縣提比經識挪用侵漁者仍卽揭報從重議處等語查代徵之場員並非專管官可比若照經徵舊例處分原屬

太過請嗣後代徵場員如初叅欠不及一分者舊
例罰俸六個月今應免其議處欠一分者舊例罰
俸一年今應罰俸三個月欠二分者舊例降職一
級今應罰俸六個月欠三分者舊例降職二級今
應罰俸九個月欠四分五分者舊例降職三級四
級今應罰俸一年俱免其停陞督催欠至六分以
上者舊例俱行革職今若止於罰俸則欠數既多
而處分太輕恐場員視爲泛常代徵不力請嗣後
欠六分者降職一級欠七分者降職二級仍令戴

罪督催欠八分以上者卽行革職再初叅處分旣已改輕則原叅各官亦不便照舊議處請嗣後代縣催比之場員原欠不及一分年限內不全完者舊例降一級畱任今應罰俸六個月原欠一分年限內不全完者舊例降三級調用今應罰俸一年原欠二分三分年限內不全完者舊例降四級五級調用今均應降一級畱任再限一年督催如再不完照所降之級調用原欠四分五分年限內不全完者舊例革職今應降一級調用原欠六分以

上年限內不全完者革職如該場員催徵不力許該縣提比經識倘將已徵錢糧內有挪移侵欺情弊卽行揭報若該縣平時不能稽察查揭致有虧空者照直隸知州失察屬員虧空例議處至有一場而坐落兩縣者其場員兩地未完分數應合算并案處分奉

旨依議欽此

鹽課初叅罰俸毋庸具題開復

雍正七年七月吏部等衙門爲遵

旨會議等事護理兩浙鹽政布政使高斌咨稱催徵錢糧各官奉文議處之後若將未完錢糧照數通完其原叅部議革職畱任及降職降俸與夫停陞戴罪督催之案俱應題請開復若止奉議罰俸而無停陞督催之案者其原叅錢糧後雖通完所奉議罰之俸仍應完解並無可以開復之處乃鹽課案內此等罰俸之官於錢糧通完之後亦均具題開復以後似應照地丁等案現行事例將續解通完銀兩於年限案內彙冊報部照案行畫一而案牘

亦免紛繁等因前來查鹽課錢糧未完各官或議處降俸降職并停陞戴罪督催者如叅後全完仍照地丁等案具題開復若初叅止以罰俸議結續報全完者嗣後俱應照地丁等案例免其具題仍令該員將罰俸銀兩完解於年限內彙冊咨報戶部核明移咨本部銷案仍劄該鹽政知照殘引遺失官商具結存案捏結加倍治罪

雍正八年六月戶部爲敬陳鹽法相沿陋弊酌議調劑清釐事議覆浙江總督兼理鹽務李衛題稱歷

任鹽臣銷過殘引例應追出繳部其中或有水火賊盜遺失及肩挑小販道路碎裂鹹浸漁戶波濤漂沒不能完全從前每將後任殘引抵數繳送又撥解定限止有八十日之期而行銷州縣共有一百餘處未能如期解足故有後引先到者卽行墊解而以續解之前引反抵後發之引臣嚴飭設法清查惟將本任銷過之引隨時追繳貯庫不許挪移牽混而在已往者莫可究詰今遠年舊引難於影射亦屬無用謹據實題明將歷任現在者儘數

繳銷其已經抵還別任及實係遺失無著者免其
輾轉追究此後逐年清出次歲遞繳果屬水火遺
失肩販漁戶損壞取具官商印甘各結聲明存案
扶同捏結加倍治罪等語均應如該督所議可也
奉

旨依議欽此

奏銷限期

雍正十年十二月戶部奏奏銷錢糧均關經制

國帑現今各省奏銷登答有延遲二三年至數十年

始行次第清結者切思數十年內州縣各官陞轉
遷換勢不能皆係承辦原人而臣部堂司各官亦
多非經手辦理之員胥吏上下其手增改牽混實
滋弊竇請行文各省一切本年登答務於次年十
月內按限清理如果頭緒繁多實有不及清查者
該督撫題明緣由量予展限倘任意延遲逾限臣
部卽行查明題叅交部嚴加議處奉

旨依議欽此

越境買鹽四十斤以上拏解

乾隆元年三月戶部爲敬陳鹽政等事查行鹽地方各省疆界原毋許彼此侵越應令該督嚴飭各該文武官弁嚴查禁遏如有越境買食零鹽過四十斤以上者卽行拏究該管上司將買賣一同治罪等因具題奉

旨依議欽此

私販拒捕傷止一人

乾隆二年三月刑部爲人鹽并獲事議覆東撫岳溶題蘭山縣張漢等販私拒捕打傷巡役郭太一案

查張漢拒捕實止傷及一人若遽照傷至二人例擬斬監候殊未允協但止傷一人爲首之犯例無明文應請將爲首毆傷巡役一人之張漢改照罪人拒捕毆所捕人至折傷以上者絞監候秋後處決下手之張臻張天珏應照爲從律減一等僉妻流三千里至配所杖一百折責四十板嗣後凡有此等案件悉照此辦理奉

旨依議欽此

場庫大使停取殷實結并揀選及期滿年分

乾隆三年十一月吏部爲澄敘官方事議覆御史褚
泰奏請場員庫大使停取身家殷實印結一摺應
概行停止以杜冒濫情弊嗣後臣部於候補場員
庫大使人員并舉人候選知縣內如有情願改就
者令其自行赴部具呈其恩拔副榜貢生考授州
同州判縣丞職銜取具赴選文結到部及曾經該
督撫驗看以州判咨部者准與舉人一體具呈臣
等公同揀選帶領引

見恭候

簡用至各員補授之後除貢生考授縣丞與大使品級
相當應停其報滿照缺陞轉外其舉人候選知縣
及貢生候選州同州判借補者三年期滿未免太
速應令於到任後計算歷俸五年果能才守兼優
整飭鹽務准其保題以應得之缺分班選用如係
循分供職之員卽行咨部停其報滿與各省現任
場員庫大使一體較俸陞轉奉

旨依議欽此

承審私鹽扣限查叅

乾隆四年七月吏部爲請

旨事承審私鹽私鑄燒鍋賭具姦拐等項事件向未著有定限嗣後一切未經定有限期案件俱請照命竊等案定例以六個月扣限完結如逾期不結該管上司卽行查叅將遲延各官照事件遲延例議處至命盜等案有以報官之日起限扣滿年限查議者如限滿不能完結又復查報遲延卽照本案定限扣算分別議處不便再予六個月之限以致牽混

鄰甲連坐分夥販大小

乾隆五年閏六月刑部爲請定竈戶等事議覆長蘆
鹽政伊拉齊疏稱十家牌甲民竈原係一體編立
第蘆東竈戶錯居民莊煎曬處所又相隔爲遠奸
竈漏私鄰甲無從知覺若不分大夥小起卽將同
甲之人連坐未免無辜牽累似應因地制宜等語
應如所題嗣後凡屬鄰近灘鍋竈戶五家互具連
環保結呈送州縣場司存查如有一家賣私事發
互結四家未經首出者照例分別夥販大小治以

不首及連坐之罪如有一家舉首者三家均予免
議仍將私鹽變價分別賞給出首之人至鄉鎮窩
囤之家事發亦應分別究治如係窩畱尋常興販
亦止治兩鄰甲長以不首之罪如係窩囤聚衆大
夥鹽梟將同甲地鄰人等一并坐罪如有一家舉
首者八家亦予免議仍將窩囤之鹽分別賞給出
首之人以示勸懲奉

旨依議欽此

竊徒拒捕傷人不得一案以兩人爲首

乾隆五年閏六月刑部會議得王恆斯等販私拒捕致傷巡役王世基等一案先據山東巡撫疏稱緣張寶珍糾約胡五王恆斯等販鹽王恆斯趕驢至道岔鹽店張寶珍與胡五踵至又有大李四等各自販私先後到店買鹽行至崔家莊被巡役王世基等撞遇喊拏各犯俱棄驢鹽而逸惟王恆斯被趕情急拾磚擲傷王世基鼻梁高萬銀亦拾土塊撩擲擦傷王大止額顱奔逸查王恆斯等鹽販九人原非一夥並未持械拒敵亦無爲首之人實非

豪強鹽徒聚衆拒敵者可比將王恆斯高萬銀均照鹽徒聚衆拒捕毆傷一人例減等擬流張寶珍等擬以徒杖具題經臣部以例內鹽徒聚衆十人以下原無兵仗遇有追捕拒敵毆傷至二人以上爲首者斬又例內若傷止一人爲首者絞監候等語該撫將王恆斯等擬流與例不符題駁去後今據東撫碩色疏稱覆查王恆斯等越境販鹽趕驢馱載實屬興販鹽徒王恆斯高萬銀應改鹽徒聚衆拒捕止傷一人例均擬絞監候餘俱仍照前議

具題查鹽徒聚衆本例必分首從若使難分首從
卽屬與例不符從無於一案之內將兩人俱以爲
首論死之事如果本非一夥難分首從則應分疏
題結毋使傳疑於後應令該撫妥議具題到日再
議奉

旨部駁甚是依議欽此

承審私鹽不實議處

乾隆六年三月刑部爲請定竈戶私賣等事議得兩
淮鹽政準奏查定例掣獲私鹽務須究出買何

場竈是何竈丁偷賣并窩囤之家據實報察并雍正六年戶部議覆嗣後凡州縣場司俱令設立十家保甲互相稽查一有私販據實首明並每季出結呈送倘有私梟未經首出被旁人告發者本犯及竈丁照興販私鹽例治罪如係尋常興販止治兩鄰甲長以不首之罪若大夥窩囤聚眾拒捕者將首犯及同甲地鄰一并連坐以上二條現在遵行無異惟是積慣梟徒串同奸竈興販私鹽及被獲到官每不將賣鹽竈戶據實供出反將殷實良

善之人任意誣扳藉端索詐而承審各官聽其狡飾不爲窮究含混完結以致積梟奸竈兩無顧忌等因具題前來應再行通飭各州縣嗣後凡審理鹽業務須究明來歷私鹽是何場竈買自何人嚴提究擬如係誣扳將被誣之人卽行釋放其誣扳之鹽犯照例加等治罪并嚴飭各分司場員再行明白曉諭十家牌甲實力稽查一有私販卽行首明如敢窩藏隱匿或經審出或被旁人告發卽照例治罪如承審各官聽其狡飾含混完結卽照不

取緊要口供例題叅議處

私販誣扳平人照律加三等治罪

乾隆六年四月刑部爲敬陳芻蕘等事議覆廣東按察使潘思榘奏查私販誣扳照鹽徒拒捕傷人律定擬係雍正三年九卿議覆大理寺少卿王廷揚條奏而律例館均未纂入臣等伏思販私罪止滿徒而誣扳平人卽加至斬候是反重於誣告人死罪未決者原未允協查雍正九年臣部議覆陞任江蘇巡撫尹繼善題孫士貴等販私誣扳耿文美

等爲同夥將孫士貴仍照例律擬以滿流欽遵在案請嗣後私販誣扳平人者仍照律加三等杖一百流三千里再誣告例載拖累致死一二人者絞監候今私販誣扳旣與誣告同科則拖累致死亦應照誣告例定擬

停止重解飯銀

乾隆六年七月戶部爲呈明通行知照事准銀庫付稱查本庫凡收地丁鹽課關稅一應批解銀兩例有隨解飯銀是以從前湖南所解黃白蠟折價并

飯銀等項亦照起解正項之例俱收隨解飯銀在案後經緞顏兩庫奏明將各省折價飯銀俱解交銀庫查收本庫因照向例每千兩元寶收飯銀七兩散碎收飯銀十兩亦在案查各處辦解物料原有應解緞顏兩庫飯銀續因停辦改解折價其飯銀仍隨折價解交是停解物料價值既得緞顏兩庫飯銀一并隨解本庫似無庸又照正項之例另收飯銀相應呈明通行各省嗣後凡有起解緞顏兩庫各項停解腳價除將原有隨解兩庫飯銀照

舊解交本庫外其本庫查收元寶七兩散碎十兩之飯銀免其重解

場員交代定限

乾隆七年八月戶部爲請定場員交盤等事題覆兩淮鹽政準奏稱兩淮鹽屬二十五場大使均有徵解折解錢糧之責按照奏銷分數考成惟交盤未有部限應如所請將兩淮鹽場大使照州縣例勒限兩月交盤將經徵經解折價錢糧并奏定報銷公項銀兩造冊由該管分司核具印結申詳鹽

運使加結呈詳鹽政咨報部科查核倘逾限未清查明新舊兩任係何任遲延分別叅處仍照限清交冊報如有侵挪虧空卽行叅追再兩淮場員交盤既定例限則凡經管鹽課大使等官自應一例遵照應行文各省管鹽督撫鹽政一體遵行各買食鹽非聚衆販私可比

乾隆八年三月刑部議覆安撫審理虹縣馬康侯等販私拒捕一案該撫將馬康侯董奇俱依鹽徒十人以下遇有追捕拒敵傷止二人以上律絞候具

題此案私鹽人贓並未現獲一任兵役開報姓名
陸續掣解除馬康侯曾經犯案外餘犯僉供止此
一次各買各鹽邂逅相遇其鹽斤自二十斤至八
十斤不等營兵擒截俱各驚竄惟馬康侯等七人
拒捕至所買鹽斤俱換糧食喫用等語是贓無實
據人非現獲既非糾夥與販何得引聚衆之條偶
然攜帶換糧亦難與販私同罪等因題駁去後嗣
據署撫將馬康侯等仍照原議具題以被搶鎗刀
業經起獲實係拒捕確憑卽係販私實據雖人鹽

不獲律有不坐不追之條而拒捕傷兵並無不究
不擬之例等語查被搶鎗刀係在五河關獲並非
現犯馬康侯家起出何以卽指爲拒捕確憑更坐
以販私實據卽令拒捕屬實亦必果係販私方擬
死罪豈因其拒捕遂不問其果否鹽徒竟行擬絞
之理此等案件自應詳加分別不應緝捕者概行
開釋其例應緝究者照買食私鹽例科罪至拒捕
人犯旣與鹽徒聚衆兵民聚衆等例不符自應照
罪人拒捕傷人律科斷等因二次題駁去後續據

該撫將馬康侯董奇改依買食私鹽律加拒捕罪
二等擬徒馬康侯年逾八旬照律勿論具題應如
所題完結奉

旨依議欽此

場員掣獲奸匪移解地方官審理

乾隆十一年十一月刑部爲請增場員約束等事議
兩淮鹽政吉慶奏嗣後除商竈因命盜賭博窩娼
奸拐匪竊鬪毆打降私宰私鑄以及海洋商漁透
漏米鹽告發案件聽地方官查辦大使不得干預

外其未經告發事件應准該場大使申禁約束一
有干犯立即就近查拏移解地方官審理并報明
運使查核如將無干之人混行捉拏及有意借端
生事擾害地方將該場員題叅議處再奏稱場員
應管事件如營私擾累例令地方官稽察則場員
與有司原屬一體亦應如所奏嗣後場員拏獲賭
博奸匪私宰犯禁等案准照文武官拏獲私鑄賭
具例將地方官免其失察處分奉

旨依議欽此

稽查糧船沿途貨買私鹽

乾隆十四年十一月戶部爲奏請因時調劑等事議
總漕瑚寶奏查鹽法定例各省貧難老幼許其負
鹽四十斤易米度日原所以養惠窮民但只令其
各自挑負易賣若結隊成羣湊合興販卽干嚴禁
今據該總漕瑚寶奏天津阿城淮安儀徵等產鹽
之鄉老幼男婦貨賣鹽斤者一遇漕艘經過卽充
塞河干混行售賣甚有黑夜傍船私相包送無知
舵丁水手暗行夾帶等語是若輩挑負鹽斤充塞

河干卽與結隊成羣湊合與販無異且糧舵夾帶私鹽例有明禁今老少鹽斤充塞販賣以致舵丁水手暗行夾帶殊干法紀總由地方官不實心查辦所致應如所奏嗣後貧難老幼負賣鹽斤行令沿途督撫轉飭地方營汛員弁於糧艘經過之時嚴行稽查毋許老幼男婦跟隨貨賣其舵丁水手應需食鹽只許向官鋪售買每人以三五斤爲率每船總不許出定例四十斤之外如有多斤夾帶私鹽等弊卽行查拏究治若不實力稽查以致夾

帶過四十斤之外者一經發覺叅送兵部照不行
詳查議處

越境興販官鹽致死巡丁照闖殺問擬

乾隆十八年八月刑部爲私販戮死埠巡事會看得
梁亞紅等謀毆鎗傷巡丁尹寶身死一案據廣撫
定長疏稱查譚勝彬等各買各鹽並未同夥且均
有埠標確據其非私鹽無疑至遇巡丁捕捉之時
均卽棄鹽逃遁並未抗拒後欲謀毆洩忿已事越
兩日與臨時拒捕不符而梁亞紅並非同買鹽之

人聽從譚勝彬討鹽謀毆以致鎗傷巡丁尹寶當
夜身死應將梁亞紅照例擬絞其毆之梁幼貞等
擬以軍流杖徒等因具題前來查梁亞紅與梁幼
貞共毆尹寶身死但梁幼貞先戳尹寶太陽係屬
微傷而梁亞紅鎗戳尹寶右臂膊深透血盆實因
此傷殞命且尹寶係下午被傷死于是夜丑時又
非當時身死梁亞紅不應如該撫所題照其毆人
傷皆致命當時身死以後下手者當其重罪例絞
候應改依共毆人傷皆致命當時未死而過後身

死究明何傷致死以重傷者坐罪例擬絞監候秋後處決餘均應如該撫所題完結奉

旨依議欽此

私鹽案件巧脫罪名將承審官議處

乾隆二十三年八月吏部爲遵

旨速議等事會覆戶部侍郎吉慶署兩廣總督李侍堯奏地方官承審私鹽案件必須究其鹽斤來自何場審明實在數目將場員照鹽法透漏成例議革如有多開人犯均其斤數爲場員巧脫罪名將承

審官嚴加議處等語查私鹽案件一經鞏獲理應
逐加究訊誠恐地方官往往爲場員巧爲開脫遇
大夥私梟非多開人犯卽均其斤數以便輕減罪
名而私梟反得肆行無忌應如所請嗣後地方官
承審私鹽案件必須究其來自何場審明實在數
目卽將失察之場員照鹽法透漏成例議革如有
仍聽多開人犯巧脫罪名者卽將承審官照徇庇
例降三級調用奉

旨依議欽此

巡兵鎗斃旁人

乾隆二十四年十二月刑部議覆浙撫莊有恭審題
德清革兵徐明瑞巡鹽放鎗致傷民人徐元芳身
死并張雲友鎗傷林君顯一案緣徐明瑞張雲友
均係兵丁隨同該營外委巡緝私販各帶鳥鎗防
虎遇有私鹽兩擔衆兵喝拏鹽犯棄擔奔逸追趕
無蹤地民徐元芳等八人赴山挑掾徐明瑞張雲
友望見多人疑爲鹽犯糾夥奪鹽恐被毆搶徐明
瑞隨手提起鳥鎗望空點放計圖嚇退不意鎗火

誤傷徐元芳左肩甲腋臍倒地旋卽殞命張雲友同時亦放鎗恐嚇致傷林君顯左腳腕脚面將徐明瑞比依鬪毆殺人律擬絞監候張雲友擬軍具題臣部以火藥殺人最爲猛烈向來辦理烏鎗致傷人命之案卽事由鬪殺尚以故殺論此案徐元芳等旣無爭角之勢亦無拒捕之形該犯等輒用烏鎗點放致令一死一傷謂之意圖嚇退並無欲殺之心殊難憑信等因題駁去後續據該撫將徐明瑞改依故殺律斬候張雲友病故不議具題應

如所題完結奉

旨依議欽此

鹽政關差任滿應繳舊

敕送科查驗

乾隆二十五年六月戶部爲通行事准戶科移會出

差各省鹽政各關監督向有坐名

敕諭例由本科挂號頒發任滿之日其應繳舊

敕先送本科查驗銷號近有赴科查驗銷號者有徑送

內閣者亦有僅報文移而未送科查驗者辦理殊

未畫一相應移會轉行務將應繳舊

敕專具文批先送本科查驗銷號轉交內閣以符定例
等因前來相應移文各管關督撫監督一體查照
辦理可也

鹽課銀兩照例添兌

乾隆二十六年七月戶部爲移付事近年各處解到
錢糧名爲按照部頒法馬彈兌入鞘竟有每鞘短
少十兩至八九十兩不等殊非慎重錢糧之道查
銀庫向例漕項關鈔鹽課例用小錠及散碎銀兩

前于乾隆四年關鈔鹽課每千兩加銀十五兩漕
項加銀五兩仍計一千兩兌收等因奏准在案向
祇照例兌收並未行知各處嗣後飭令於起解時
遵照銀庫奏准定例每鞘按數添入詳細彈兌毋
許絲毫短少仍慎選解員押運如到庫兌收時短
少十兩以內者仍照例准令解員卽時補交足數
倘有短少銀數懸殊者臣等卽行指叅照例議處
仍令將緣何致有短少之處查明自行奏

聞奉

旨依議欽此

鹽課考核定限

乾隆二十六年九月戶部爲鹽課考核事查兩浙考核先經本部以二十四年考核遲至二十五年始行造冊具題行令查取遲延職名送部查叅在案今據該撫咨稱兩浙考核錢糧向照該撫經管日期扣算至一年限滿造報考核其間正署各任久暫不同而任內應徵錢糧引目必待課完引銷方入冊報此項考核錢糧雖與奏銷兩案而徵收解

完冊報委係彼此相因所有奉取遲延職名應請
邀免等語查兩淮考核例於奏銷後扣限兩月具
題今兩浙鹽課具題與兩淮考核定限兩月之例
尚屬相符應毋庸議嗣後鹽課考核無論正任署
任總於奏銷後定限兩月題報之處應如所咨辦
理如有遲逾卽行查明報叅可也

鹽庫大使分別五年保題六年甄別

乾隆二十七年八月吏部爲敬陳管見等事准浙江
巡撫莊有恭咨稱鹽場大使向無兩任接算保題

之例乾隆十一年部議將鹽大使准照教職六年俸滿一體接算前俸之例五年期滿分別保題惟前任歷俸四年以上者雖年限已滿應俟到任一年後方准接算今准部示內開除舉人候選知縣補用鹽庫大使人員屆期五年仍照舊例辦理外其有恩拔副榜考授州同州判借補等官照佐雜之例一體以六年爲期甄別一次其扣俸之處查鹽庫大使向係專計本省本任之俸並不通算從前他處之俸今旣入於甄別案內紬繹文意似惟

借補及改捐等官始准照佐雜之例接算前後俸
次至舉人補用鹽庫大使仍應照舊專計本省本
任之俸似與前奉部行不符咨請示覆等因前來
查舉人候選知縣補用鹽庫人員屆期五年原有
保題之例其有前後兩任者亦准照十一年通行
案內接算兩任分別辦理是以本部議覆案內舉
人補用鹽庫人員屆期五年仍照舊例辦理正謂
照舊報滿亦卽照舊接算俸次五年期滿卽不在
六年甄別之例例意甚明並非前後互異至借補

捐納人員俱係照缺陞轉卽在六年甄別之例是以與佐雜等官一體甄別相應咨覆該撫可也
運副運判缺出應補捐納輪用

乾隆三十二年二月吏部爲請

旨事浙江巡撫熊學鵬咨稱寧紹分司運副員缺例應在外題補若遵先用捐納新班之例似應將豫工例之徐觀政題補但尚有丁憂服闋之劉祖佑一員前經部覆俟在先捐班人員補用後將該員題補今分發在先之潘榮燮等俱經補用及告降在

案又似應將劉祖佑題補應將何員題補之處咨請示覆等因前該省捐納分發運副人員已無在劉祖佑已前之人其豫工捐納之徐觀政雖係新班而分發在後此次應照咨准將劉祖佑照例擬補庶與原奏相符臣等附有請者此等運副運判等官各省題補不歸月選但不酌定班次必俟分發在先人員補用完日方准題補則起復應補之員不無偏枯查銓選則例內開各項應補開復人員俱歸單月一應補一捐納輪流間用等語請嗣

後各省運副運判缺出均照銓選定例按一應補
一捐納輪流間用如無捐納之員專用應補如無
應補之員專用捐納其捐納官員有新班舊班不
同亦照銓選等例按四新一舊挨次補用如新班
無人專用舊班如舊班無人專用新班如應補及
新班舊班俱無人到省再遵舊例於現任屬員內
揀選具題奉

旨依議欽此

大夥私鹽議處議敘

乾隆三十五年五月吏部奏准酌改文職處分則例
一十人以上帶有軍器興販私鹽失察各官係本
處拏獲一半照例免其處分其本處並未拏獲被
別處全獲者將專管官降二級畱任三年無過開
復兼轄官罰俸一年若別處雖拏獲一二人者仍
照失察大夥私鹽例處分至限年緝獲之後計未
獲人數自行拏獲一半以上者將原叅降級并限
緝之案准其開復未經拏獲仍照二叅例處分若
係別處拏獲者仍照別處拏獲例專管官降二級

調用兼轄官罰俸一年

大夥私鹽拒捕

乾隆三十五年五月吏部奏准酌改文職處分則例
一私梟黨衆官兵不能挈獲或止獲二三名及兵
丁被殺傷者將失事地方專兼各官仍照失察大
夥私鹽例處分

鹽課耗羨未清不得請敘

乾隆三十六年二月吏部爲經徵事議覆四川布政
使劉益奏稱鹽課耗羨向不隨正課完納嗣後必

須正課耗羨均於奏銷前通完方准請敘倘止完正課羨餘未清止應免其處分不得濫邀敘典等語查經徵鹽課并額徵耗羨均爲

國帑攸關自應俟一體通完予以議敘應如所奏嗣後奏報州縣鹽課全完議敘案內并將額徵耗羨一起全完之處隨案聲明如正課已完耗羨不清不得遽行議敘奉

旨依議欽此

運司交代限期

乾隆三十六年十二月吏部爲司庫交代等事議覆
江寧布政使閔鶚元奏稱藩庫爲錢糧總匯款目
紛繁交代限期太促或致鹵莽麤疎所關不細請
嗣後藩司遷調限半月清交庫存銀兩起身外其
交代仍聽新任實力稽查悉循照舊例扣限以昭
慎重各省鹽運司庫亦屬錢糧數多似亦應照舊
限等因前來查舊例藩司交代定限兩月臣部從
前議覆尹嘉銓條奏給憑案內定議改爲一月本
爲交任之員嚴其限期俾得速赴新任至接任之

員凡一切支收例應分款造冊原可另給限期嗣後布政使遇有遷調仍照奏准定例勒限一個月交代至接任布政使逐款釐查時日稍寬綜核愈細應如該布政使所奏仍循照舊例扣限無庸更改鹽運司新舊各官俱照藩司之例辦理奉

旨依議欽此

場員知府師生迴避

乾隆三十七年十月吏部爲遵例詳明事准署浙江巡撫熊學鵬咨據下砂二三場大使試用知縣吳

元潛詳稱松江府知府韓錫胙曾充江南鄉試同考官該大使係由本房呈薦中式今現爲親臨本府該場賦歸浙省徵收地隸江南管轄該場一切催徵舉劾事宜統由松江府稽查考核似與州縣無異但場員知府迴避例無明文應否比照州縣之例一體迴避咨部核覆等因應照州縣迴避之例令該撫於現任場員內酌量具題更調場員赴選聲明商籍

乾隆三十九年三月吏部爲請定場所等事議覆浙

江巡撫兼管鹽政三寶奏前事等因查鹽大使一項無牧民之任例不迴避本省至商籍人員向無迴避之例是以赴選文結內並不聲明今該撫以大使一官品秩雖卑督煎稽私掣驗引目乃其專責若本係該處商籍其父兄親友卽在其地行鹽而官與商同在一處分密情親則攀援瞻顧亦難保其必無奏請迴避本省卽於起文時在文結內聲明某省商籍字樣咨部查核迴避應如所奏嗣後鹽場大使批驗所大使如止籍隸本省並非商

籍者仍照舊例毋庸迴避外若係商籍之員於起
文赴選時在文結內聲明某省商籍字樣咨送吏
部註冊銓選時照例呈明以憑查核迴避倘敢捏
飾隱諱別經發覺照規避例革職奉

旨依議欽此

鹽庫大使缺出在外題補者毋得咨補

乾隆四十年六月吏部爲通行事定例各省鹽庫大
使缺出按班輪用引

見補授如該鹽政以辦理需人奏請揀發候補捐納並

舉人知縣一體揀選引

見命往効用遇缺酌量題補等語是鹽庫大使缺出在外例應具題補授今各直省間有咨部辦理者俱經本部照例更正並將該督撫隨本察議題覆奉旨在案相應行文各督撫嗣後遇有鹽庫大使等缺出在外題補者俱應照例具題毋得咨補

鹽庫大使前後接算俸次

乾隆四十年八月吏部爲詳請等事准山東巡撫楊景素咨稱查鹽庫大使由舉人候選知縣借補者

向係計俸五年報滿是以乾隆二十七年部議有屆期五年仍照舊例辦理之文卽乾隆三十四年部議內亦統言鹽庫大使而未分晰由舉人出身者一體應以六年扣俸迨三十七年由舉人出身之西繇場大使王志夔五年報滿始奉部議令照六年扣俸現如遇有舉人鹽庫大使俸滿應否扣俸六年抑仍照舊例扣俸五年并其中有前任庫大使今補鹽大使亦有前任鹽大使今補庫大使者應否准其接算前俸扣滿之處咨部示覆等因

前來查乾隆三十七年本部纂修則例內開各省
首領佐貳雜職并鹽庫大使等官接算前後歷俸
已滿六年者督撫調取驗看甄別咨部彙題等語
是鹽庫大使六年俸滿例有明文至由舉人揀補
捐納者歷俸五年果能整飭鹽務惟在該鹽政督
撫核實保題候

旨錄用如係循分供職之員咨部停其報滿又鹽庫大
使出缺定例如無專項人員俱准通融補用與別
項專補原官者不同自應准其前後接算俸次如

前任歷俸已逾四年以上雖年限已滿亦應俟到任一年之後核其才守果優方准接算保題其由貢監生捐納鹽庫大使人員歷俸已滿六年其中實有才具出衆堪膺保薦者照首領佐雜等官之例出考具題保薦其甄別畱任勒休俱應前後接算六年照例查辦相應咨覆該撫并通行各督撫府尹鹽政查照可也

捐發鹽經歷不准通融借補

乾隆四十三年五月吏部爲詳請咨部示覆事准浙

江巡撫王亶望咨稱浙省鹽經歷祇有一缺而指捐分發人員現有五人若俟次第揆補未免壅滯前因分發試用佐雜俱人浮於缺將試用布政司經歷府經歷等以縣丞咨署均蒙覆准雖指捐鹽缺稍與地方官有間而五員一缺補用無期似當酌爲調劑查鹽經歷係從七品照布政司經歷借補縣丞事同一轍但浙省未經辦有鹽屬經歷借補地方官缺之例咨部查照示覆等因前來查鹽務等官俱係指項報捐向例加捐分發之員本部

查無鹽務額缺省分卽行扣除不准分發原以地方與鹽務各有專司並無准其通融借補之條自不便以補用需時稍爲遷就且鹽經歷旣可以借補地方將來各省大使知事等官勢必以守候無期紛紛借補於銓法更屬有礙所有該撫咨請鹽運司經歷做照布政司經歷借補縣丞例通融辦理之處不便准行

本省充商子弟原籍應試冒籍借引商人一并治罪

乾隆四十三年閏六月禮部爲知照事議覆山東學政姚梁奏嚴冒考商學運學之例以杜弊濫等因一摺商人行鹽別省距本省地方寫遠其子弟自當列入商籍考試以免往來守候之艱若係本省之商去本籍不遠原毋庸以商籍應試且恐彼此跨考父子兄弟籍貫兩歧其弊均所不免應如該學政所奏嗣後本省商人卽領有鹽引者均令歸入本州縣原籍應試以免混淆至冒籍之貢緣得入者必假有引商人冒認子弟名色方能入籍亦

應如所請嗣後有冒入商籍者除本人及綱保廩
保照例治罪外其借與鹽引之商人亦一并分別
治罪再該學政又稱有原引已售引名未改者不
得仍以原引爲據查本年大學士公阿桂等查辦
冒籍原案內開商籍童生考試結內註明現行何
地引鹽字樣以憑查核原指現在執引行鹽之人
而言應行文各該督撫會同鹽運使遵照查辦奉
旨依議欽此

墮銷處分及巡鹽標弁敘罰

乾隆四十三年八月吏部爲遵

旨議奏事會覆大學士仍管兩江總督高晉等奏請將
墮銷處分略爲變通自五分至七分以上均改爲
實降只准以加級抵銷不准以融銷開復等語查
鹽引未完舊例惟八分以上者革職其自一分以
至七分者降俸降職俱令戴罪督銷且以融銷別
案准其開復是有虛降之名而無處分之實應如
所奏除未完在四分以上仍照舊例辦理外其五
分以上舊例降職二級者卽改爲降二級調用六

分以上舊例降職三級者卽改爲降三級調用七分
分以上舊例降職四級者卽改爲降四級調用不
准融銷開復任內有軍功錢糧加級紀錄者准其
抵銷至別項級紀仍不准其議抵再該督等奏稱
巡緝私鹽標弁自應分別勤惰酌予敘罰請於私
鹽要隘派委候補千總前往巡緝半年更換如有
獲私至四千斤以上者准其畱巡一次如半年期
內能緝獲大夥私鹽久慣窩頓并積算鹽斤在一
萬斤以上者遇缺先行補用兵役加倍賞給等語

應如所奏辦理如巡弁懈忽疎縱被鄰境挈獲該督奏請按照鹽斤多寡分別叅處斥革兵役一體懲究之處臣等悉心酌議嗣後派出巡鹽標弁如半年期內疎縱漏私數至四千斤者降一級畱任四千斤以上者降一級調用一萬斤以上者革職兵役嚴行究處奉

旨依議欽此

失察私鹽過境

乾隆四十四年十一月吏部奏准酌改銓選處分則

例一失察私鹽過境宜照武職增定處分也查兵部奏准條例內開定例與販私鹽照大夥小夥分別議處其沿途經過地方因向無成例遂與失察與販固賣者一律處分第思私鹽過境不過片刻經由該汛雖有失察究與在境販賣者輕重懸殊若一例辦理未免漫無區別嗣後失察經由地方並無畱住販賣情事者如係大夥專汛官罰俸一年小夥罰俸六個月等語文職事同一例應請嗣後將失察私鹽經過之地方官卽照武職例查係

大夥議以罰俸一年小夥罰俸六個月
武弁鹽規分別停支

乾隆四十七年十二月戶部奏爲奏

聞事查各省巡鹽官兵向有收存鹽規房地租銀作
爲巡緝之費今已給予養廉其向得鹽規等銀自
應停給至兵丁得項無多往返緝查不無所需若
一體刪除恐形竭蹶仍請照舊支給其巡緝私鹽
均責成專汛及鄰汛額缺員弁經管設有身離本
汛委派他處巡緝堵禦者仍于節省銀內酌量給

予盤費以資辦公奉

旨依議欽此

紙硃銀兩於領引時隨文解部

乾隆四十八年正月戶部爲行催事長蘆每年應解額餘鹽引紙硃銀兩查四十一二三四五六等年共積有未解銀八千二百三十三兩六錢四分先經本部行文飭卽查明報解迄今日久應再行文直隸總督長蘆鹽政迅卽報解并行令各該管鹽督撫鹽政嗣後赴部領引時卽將紙硃銀兩按引

核明隨文解部以清年款

鹽場缺出輪補

乾隆四十八年九月吏部爲詳請調補場員等事議
覆兩淮鹽政伊齡阿等疏稱現奉部議各省員缺
應先儘揀發及補班人員補用不得以分發人員
越次攙補等因但兩淮尚有分發人員多年未經
得缺若俟全行補用方請揀發則各項差委必致
貽悞若補用未完預請揀發則揀發人員一到卽
須先儘補用及補用將竣又須續請揀發如此層

積壓班勢必從前分發人員永無得缺之期應請
通融輪補等語查臣部議覆陞任湖南巡撫李世
傑條奏案內將各省試用人員定以分班按序題
咨補缺原因近年議敘捐納并大挑一等分發各
員人數較多是以議定分班輪用俾免偏枯至鹽
屬各員除丁憂服滿仍赴原省人員之外止有揀
發分發二項爲數無多與地方州縣佐雜不同如
盡用揀發人員勢必層積壓班從前分發人員永
無得缺之日應如該鹽政等所請嗣後凡各省屬

缺出毋庸分班仍照舊例聽該鹽政等酌量人地
相宜通融輪補奉

旨依議欽此

場員迴避本省

乾隆五十二年十月吏部爲大使試看期滿請

旨實授事議覆浙江巡撫兼管鹽政覺羅琅玕等疏稱
崇明巡鹽大使陸費鑒試看一年期滿該員年力
強壯辦事勤能仰懇

天恩准其實授等因前來查陸費鑒與實授之例相符

應如所請准其實授等因具題奉

旨吏部議覆琅玕題請以陸費鑒實授崇明巡鹽大使
一本陸費鑒著該部於調補別省後卽准其實授向
來鹽大使因無地方之責並不迴避本省是以陸費
鑒籍隸浙江仍發浙江委用但思鹽場各員與州縣
官專司民社者雖屬有間然鹽斤旣關係民食且所
屬曬丁竈戶錢糧詞訟俱係該員經理究恐有徇私
瞻顧等弊嗣後鹽務各員銓選分發俱令迴避本省
其現在各省鹽務各員有籍隸本省者著該部一體

查明籤掣更調以示慎重官方之意著爲令欽此

攪和沙土

乾隆五十五年戶部題定則例一竈戶將官鹽攪和沙土者照丁舵已經攪和漕糧例治罪管鹽提舉大使如係縱容照攪和漕糧運弁不行查禁例議處如止失於覺察量減一等若知情受賄照枉法贓從重治罪官鹽著令經管官名下煎賠

一各省官辦鹽斤每年開煎時管鹽官將鹽樣呈送鹽政衙門驗發鹽道收貯如分發各屬行銷有夾

帶泥沙者許承銷州縣呈報叅究倘明知攙和不行呈報將瞻徇容隱之員一并題叅

場鹽離垣

乾隆五十五年戶部題定則例一鹽場設立公垣場官專司啟閉竈戶煎鹽俱令堆貯垣中與商交易如藏私室及垣外者卽以私鹽論商人領引赴場亦在垣中買築場官驗明放行倘有私販夾帶等弊該場官役一并叅處

糧船食鹽

乾隆五十五年戶部題定則例一漕船受兌回空每船往返各准帶食鹽四十斤於查鹽處聽官稱驗如有多帶照私鹽律科罪若零星稱出餘數僅及二十斤非係影射夾帶不坐所餘之鹽仍變價入官

船戶盜賣商鹽

乾隆五十五年戶部題定則例一各省商運鹽斤如船戶實有勾串私梟盜賣爬搶情事准該商呈明地方官一面將船戶等查拏治罪一面轉報該鹽

政核實所失鹽數補配行運將失去原鹽在各犯名下勒追變價報部充餉若地方官於商人呈報時不卽據報准理故行抑勒者指名題叅倘查係商人串通船戶盜賣捏報搶竊者照私鹽例治罪
隱佔竈地

乾隆五十五年戶部題定則例一各場竈地止准竈戶管業不准豪右隱佔違者治罪

遺失引票

乾隆五十五年戶部題定則例一商人領運引票在

內河失水呈明地方官詳查確實結報鹽政運司
鹽政印給照票飭商補運鹽斤在大江失水州縣
官會同營員查勘確實限一月內通詳鹽道於州
縣詳到日起限半月內核轉鹽政印給照票飭商
補運限三個月過所運岸若係殘引殘票失火失
水所有遺失引票數目由營汛地方官出結鹽道
加結申報督撫鹽政核實送部仍於奏銷冊內聲
明題銷至補給印票同殘引一并繳部倘有奸商
捏報查究治罪營汛地方官或有藉端勒索及通

同捏報一并查叅分別究擬

繳引遲延督催處分

乾隆五十五年戶部題定則例一各省商人領引賣鹽後各該管鹽督撫鹽政將鹽引截角於本年奏銷後解部繳銷如繳引遲延除將經銷州縣送部議處外並將督催運司鹽道各職名一并查叅分別議處

彙奏鹽務期限

乾隆五十五年戶部題定則例一各省鹽務應完雜

項應繳殘引如有歷久墮積並未勒限完解者每屆五年由部彙查一次開單具奏以示清釐

加增鹽價

乾隆五十五年戶部題定則例一凡商人運鹽有定價者照額發賣不准加增無定價者不得高價病民違者治罪

兩浙行銷各屬鹽斤價隨時售並無一定

場員考成期限

乾隆五十五年戶部題定則例一各場柵額收鹽斤俱以業經配運開行者方准作為收數入於旬月

報之內每半年由運司會核一次如實較定額多配鹽若干卽予記功獎賞實較定額少配鹽若干卽查照分數叅處以杜場員虛報走私等弊

盤查庫貯

乾隆五十五年戶部題定則例一直省按察司庫貯驛站錢糧每遇交代造具冊結會同藩司查核詳請題報糧鹽道庫錢糧每值奏銷交代照盤查布政司庫之例責成同城督撫及鹽政盤查出結具疏題報督撫鹽政新任受事亦一例盤查

一布政司鹽道庫貯錢糧該司道倘有侵挪許庫官
徑行揭報該督撫鹽政盤查得實將庫官題請議
敘若庫官通同徇隱事發一體治罪庫官已經揭
報而督撫鹽政不行題參者照徇庇例議處

挈獲鹽梟照例分別給賞

乾隆五十九年六月戶部爲移付事護理兩浙鹽政
阿林保疏稱浙江省乾隆五十八年分各屬私鹽
變價除五月奉文以後凡有挈獲私鹽照例全行
給賞外所有未奉文以前各屬解完私鹽變價銀

九十六兩八錢相應遵例詳題等因奉

旨該部知道欽此查兩淮各屬獲報私鹽先經軍機大臣議准嗣後無論巡役兵民但能挈獲梟販者卽將所獲鹽貨車船頭匹全行給賞嗣于乾隆五十七年十一月內復准護理江西巡撫託倫咨稱嗣後人鹽並獲者照依新例全行給賞如獲鹽不獲人者概以一半給賞一半照舊報解充公經本部覆准在案今浙省事同一律相應鈔錄原案劄付該鹽政遵照辦理

巡撫鹽課考成

乾隆五十九年吏部題定處分則例一巡撫兼管通省糧餉其鹽課考成欠一分者罰俸三個月欠二分者罰俸六個月欠三分者罰俸九個月欠四分者罰俸一年欠五分者降俸一級欠六分者降俸二級欠七分者降職一級欠八分者降職二級欠九分者降職三級欠十分者降職四級以上俱令戴罪督催停其陞轉其署官催徵督催處分俱照正官例議處署印不及一月者免議

鹽引賣與別縣處分

乾隆五十九年吏部題定處分則例一此縣之引賣與別縣者未經查報之府廳官罰俸一年道員罰俸九個月布政使按察使罰俸六個月

徵課銷引全完議敘

乾隆五十九年吏部題定處分則例一各省經徵鹽引催徵各官能於奏銷前催徵全完或前官並未徵解接任官於奏銷前催徵全完總以一官全完一年課引者無論正署俱照地丁錢糧例議敘其

兩浙代徵場員全完五萬兩以上者准其紀錄一次不及五萬兩奏銷前全數通完者統兩年合算將兩年應徵之數徵收全完亦准其紀錄一次通融銷售地方及正課雖完耗羨未完并本年帶銷之項未完者俱不准議敘該督撫鹽政於題銷疏內分晰聲明以憑核議如有未完捏報全完者俱照地丁錢糧捏報全完例議處

煎販私鹽

乾隆五十九年吏部題定處分則例一官員該管界

內有伊衙役私行煎販或私賣者本官不能覺察別經查出者革職其軍民人等在伊界內私行煎鹽或私賣不能覺察別經查出者降三級調用兼轄官降一級罰俸一年該管官自行挈獲者免議或自行查出未經挈獲詳報通緝者俱照例革職降級畱任限一年緝挈逾限不獲仍照例降革其兼轄之上司俱免議如旗下人私鹽事發伊主係官罰俸兩個月自行挈獲者免議至官員行鹽無術以致商販不前或不遵行食鹽舊例借端不行

鹽者俱罰俸一年或苦累需索以致商販不前者
降一級調用

匿報鹽犯

乾隆五十九年吏部題定處分則例一大夥興販隱
匿不報及人鹽並獲輕爲開脫者專管官革職兼
轄官降二級調用至大夥私鹽必有爲首之人若
該地方官明知不報事發將匿報各官革職嚴加
議罪

糧船回空夾帶私鹽

乾隆五十九年吏部題定處分則例一凡關津過往回空糧船如有夾帶私鹽貨賣管船同知通判等官知情故縱者革職不知情者降三級調用

鹽船失風失火

乾隆五十九年吏部題定處分則例一鹽船失風失火責成州縣官會同營員查勘確實限一月內出結通詳鹽道於詳到日起限半月內核轉以憑飭商補運限三個月過所運岸仍令沿途督撫及該管鹽道知府直隸州隨時查察如實係失風失火

而有勒索捺攔及受賄扶同捏報情弊卽將該員指名題叅治罪如將淹消火燬之案勘訊不實卽行結報後經發覺者將結報不實之員照不行查明給結例罰俸一年

鎮江關口盤查私鹽

乾隆五十九年吏部題定處分則例一鎮江關口盤查私鹽責成常鎮道督同鎮江府海防同知就近分班輪流盤驗無論糧艘兵座大小差船俱親身查驗如有夾帶整包私鹽卽拏究照興販律治罪

其一切水陸私販並嚴飭該管官分頭查拏如有疎縱失察照例叅究仍嚴禁官役毋得借拏私鹽名色勒捐商民需索進聞使費倘該道員不實力整頓或有夾帶而不能查拏或有勒索而不能懲禁督撫指叅失察私鹽照失察例處分不能懲禁勒索照失察衙役犯贓例處分不能查禁屬員照約束不嚴例處分

鹽徒搶奪開闢

乾隆五十九年吏部題定處分則例一地方有奸徒

搶奪鹽店及闖鬧場竈等事文武官弁卽行拏獲
究出主使同夥如獲犯過半並獲首犯者仍參疎
防照盜案例免其處分如獲犯不及一半或不獲
首犯者照盜案例參處限年緝拏限滿不獲亦照
盜案例處分如平時漫無約束臨時不卽擒拏有
意姑息致長刁風者將該管官弁照溺職例革職
各犯交與接任官照案緝拏該管巡道府廳直隸
州將備等不行揭報一并查參如地方官弁整飭
有方鹽引疏銷私販斂跡一年內無應參之案准

其紀錄一次三年內無應叅之案准其加一級若有希圖議敘隱匿不報或將大夥之案捏作偶然湊合巧爲開脫者一經查出卽照匿報鹽犯例議處

給照販私

乾隆五十九年吏部題定處分則例一官員不能掣獲私煎及給印照興販者革職提問上司知情故縱者亦革職一并審究失察者降一級畱任再罰俸一年

侵入私鹽贓物

乾隆五十九年吏部題定處分則例一地方官掣獲私販務將人鹽數目據實詳報一切私鹽贓物例應入官者不得有一毫隱諱如將所獲私鹽侵入已橐或與各役分肥並大夥拒捕之案從中漁利將人鹽數目以多報少者將該管官弁題叅革職計贓照枉法律治罪其未曾侵匿者照徇隱例議處上司各官知情故縱者照徇庇劣員例議處雖不知情而未經揭叅者照不揭報劣員例分別議

處

失察私鹽因公出境免議

乾隆五十九年吏部題定處分則例一私鹽經過境內如有實係因公出境之員卽於查叅案內據實確查聲明准其免議如並非因公出境混行詳請者降一級調用該管上司並未確查代請免議者罰俸一年

鹽員

大計考核

乾隆五十九年吏部題定處分則例一凡舉行

大計之年鹽員內有操守廉潔才具優長政事勤敏者
令各該鹽政會同該督撫或兼管鹽務之督撫密
行考核賢否開具事實保題有干六法者亦照六
法例題叅議處

欽定重修兩浙鹽法志卷十四終